

U *Muallimovom forumu* u ovom broju bavimo se jednim našim hroničnim, lokalnim i globalnim, gotovo tragikomičnim, ali ipak ozbiljnim pitanjem. Riječ je utvrđivanju takvima, odnosno određivanju značajnih vjerskih datuma, u prvom redu početka i kraja mjeseca ramazana, bajrama i dana Arefata i zbrci koju kod nas imamo svake godine u tom pogledu. U ovom broju *Muallima* nekoliko referentnih autora pišu o različitim aspektima muslimanskog lunarnog računanja vremena i utvrđivanja vjerskog kalendara prema tradicionalnom (putem viđenja mlađaka) i astronomskom izračunavanju značajnih vjerskih datuma i blagdana. Tako Mustafa Sušić u svom radu iznosi najvažnije elemente u 'genealogiji' prošlogodišnjeg slučaja odstupanja od našeg bosanskog Takvima, sačinjenog prema astronomskom računanju vremena i preinačavanja datuma Arefata, prema odluci vlasti Saudijske Arabije da prvi dan zul-hidždžeta pada u srijedu, 17. oktobra a ne dan ranije, kako je stajalo u našem Takvimu. Autor u svom tekstu donosi i kratki historijski pregled nekih stavova i diskusija uleme o ovom pitanju. Zalažući se za jedinstveni kalendar za cijeli muslimanski svijet Enes Ljevaković iznosi svoje razloge i argumente za opravdanost prošlogodišnjeg odstupanja Islamske zajednice od vlastitog Takvima. U *Muallimovom forumu* Enes Karić objavljuje svoj kritički tefsirski, teološko-filozofski esej o muslimanskom računanju vremena pod naslovom "Čekajući odluku o muslimanskom Greenwichu". Kao prilog ovoj temi *Muallimov forum* donosi i tekst Fehima Spahe koji je prvobitno objavljen u Novom beharu 1934/35., a koji potvrđuje hronični karakter ove naše boljke. U najkraćem, *Muallimov forum* u ovom broju trebalo bi da izazove pažnju najšireg kruga njegovih čitalaca, a u prvom redu ozbiljnu pažnju, a to znači temeljito čitanje svih u Islamskoj zajednici koji su odgovorni za ovo pitanje i koji su pozvani da ga riješe.

U rubrici *Putokazi* Fikret Karčić objavljuje znanstveni rad, značajan za sve one koji se bave koncipiranjem razumijevanja i tumačenja islama u Islamskoj zajednici, o strateški važnom pitanju odnosa etno-nacionalnog i vjerskog u diskursu neke naše uleme. U rubrici *Sagledavanja* Muallim predstavlja dva iznimno značajna rada. Rifet Šahinović piše o islamskom razmišljanju Prirode a na temelju analize kozmoloških učenja u Nasrovim djelima. U drugom tekstu iz ove rubrike, kog je preveo Enes Karić, Annemarie Schimmel se bavi estetskom stranom Iqbalova djela.

U rubrici *Muallim* u ovom broju objavljujemo rad hafiza Sulejmana Bugarija koji se na temelju teorijskih uvida ali i referentnog vlastitog iskustva bavi pitanjem uloge duhovnosti u socijalnom radu. S druge strane, Sakib Kurtić u svom radu pod naslovom "Kompleksniji pristup borbi protiv zloupotrebe opojnih droga" obrazlaže potrebu svestranijeg odnosa cijele društvene zajednice prema borbi protiv opojnih droga.

U rubrici *Historija obrazovanja* za sve naše čitaoce, a posebno sve imame, hatibe i muallime, svršenike Gazi Husrev-begove medrese, objavljujemo radove koji čuvaju naše dužno sjećanje na naše alime hafiza Ćamila Silajdžića, Nijaza Šukrića i Hasan efendiju Hilića o kojima pišu hafiz Mensur Malkić, Ifet Mustafić i Hamdija Nesimović.

U rubrici *Muallimov intervju* sa akademikom Rešidom Hafizovićem razgovara Samedin Kadić.

U rubrici *Islamske teme* objavljujemo pet značajnih studija: Meho Šljivo piše o "Retorici u konstitutivnim izvorima islama", Ishak Alešević "O pozivu imama", Salih Indžić o "Ocjeni seneda i radu bošnjacke uleme na ukazivanju njegove slabosti ili apokrifnosti", hafiz Midhat Beganović piše o "Dozinim raspravama sa tradicionalnom ulemom" i Šefko Sulejmanović o "Četiri biljanske džamije".

U ovom broju objavljujemo hutbe hafiza Muriza ef. Mešića i Amira ef. Čauša uz recenzije Ishaka ef. Aleševića i hafiza Enesa ef. Beganovića.

U rubrici PREGLED Muallim svojim čitateljima donosi prikaze knjiga vrijednih pažnje, te dva teksta o muzici 'kosmičke ljubavi' - *sema'u* i o tradicionalnoj ujgurskoj muzici.